



## 𠵿見角个幸福

訪視个時間又到咧，領著善心人士捐个生活必需品，同共伴起腳行，正參詳愛對哪家屋起勢等，腦隔中斯像放電影个樣，浮出一個一個個畫面咧。瘟痾瘦弱个身胚、像大象樣、腳跛啊跛還迎緊來門口个身影、該跳跳搖搖走緊來開門个細阿鳥、該原住民阿姆降个「小帥哥」……。逐個月分人期待个心情，正經好過頭鉤鉤望俵、等妹轉來食飯呢！

「妹妹！」屋家無電鈴，用咻个，腳無已好使个老伯姆，膨凳項言蹶蹶來，孫女乳嘴一擲斯走緊來開門咧。這細阿鳥，對打燈起勢到這下愛讀噉咾園，吾等看緊佢月月大。厥个出世毋係爺哀个想望，也無受著他人个祝福，園在這外阿婆个屋家，佢恬恬大，因致恁泥，各方面个發展，比得共歲數个細人慢加已多。愛讀幼稚園哩啲，話還講來毋係已順溜，乳嘴、尿褲乜還黏在圍身項。知吾等會笑佢，毋帶佢去買「多多」，逐回一聽著吾等咻，佢斯遽遽擲奶嘴、揪尿褲。陪佢搞一站，同老伯姆打下嘴鼓，看得出這時間，這一老一嫩做下係歡喜个。愛走之時，細阿鳥逐到門口追緊問：「阿姨，哪時過來？」無麼曉講話，「過來」斯唸幾下擺。

人个命運係上天个安排，這毛白白、背瘟瘟个老伯姆，照一般人个命底來講，佢係歪命。無田無產，身邊个親人伸著兩個讀高中个外孫，還過一個無嫌佢擁人个婿郎。妹死撇，佢替婿郎管顧兩個孫，雖然無像一般正常家庭恁泥樣个燒暖，毋過，講著婿郎，這老伯姆已滿足，佢試著厥幸福斯在這一屋間肚。雖然身體毋健、藥無斷，屋肚唯一個消遣——電視，乜係老式个三十六吋，老家具刻核歲月个蹤跡，看得出盡少也有三十年个歷史咧！毋過老屋分老人收摯去淨利淨利，入到這，顛倒會有歸身放鬆个好感。論起真上天對老伯姆並毋係真照顧，毋過老伯姆毋識怪怨，同吾等講个話乜做下係感恩、惜福个好話。怪得婿郎對佢有孝，無棄無嫌、認真做事，孫乜乖，認分讀書。上天關撇厥該人世間認為好命个門，毋過佢自家打開幸福个窗，共樣看得著天頂个日頭、星光。

「小帥哥」遺傳著厥原住民阿姆个五官，目珠烏白分明大嫻粒，鼻公崑錐錐錐，哦！該大漢定著錫來一陣蜂同蝶。人靚命毋靚，還在坵雞屎該下，厥姆斯將佢搵分厥爸做佢走咧，一走斯毋識過轉來。這下「小帥哥」國小三年生，除撇上課，其他時間做下跔厥爸滿哪送貨，成半下功課還愛帶上貨車肚寫，無好推懶，兩子爺賺个係艱苦錢，毋過乜賺著親情。訪視時間吾等問一句這「小帥哥」斯答一句，無加講，毋過感受得著厥个驚羞，厥个無自信！恁大奈等斯承受恁多个壓力，逐擺訪過厥屋家，總試著心肝頭有一粒大石頭，砣著人故氣毋得！

你係毋係輒輒會試著自家真衰？事事毋順？抑係為著小可事情慍悴歸日？看看這兜𠵿見角肚認真生活个人，學習厥等个韌性，若个心斯會黏時開陽起來！

作者：劉玉蕉

### ☆詞彙學習☆

【起腳行】ki<sup>ˊ</sup> giog<sup>ˊ</sup> hang<sup>ˊ</sup>：邁開腳步走。

【噉咾園】gieu<sup>ˊ</sup> zhi<sup>+</sup> rhen<sup>ˊ</sup>：幼稚園。

【起勢等】ki<sup>ˊ</sup> shi<sup>ˊ</sup> nen<sup>ˊ</sup>：開頭而已。

【論起真】lun<sup>ˊ</sup> ki<sup>ˊ</sup> zhin<sup>+</sup>：照理說。

【瘟痾】vun<sup>+</sup> gu<sup>+</sup>：駝背。

【坵雞屎】rha<sup>ˊ</sup> gie<sup>+</sup> shi<sup>ˊ</sup>：比喻年幼時。

【跳跳搖搖】tiau<sup>ˊ</sup> tiau<sup>ˊ</sup> chug<sup>ˊ</sup> chug<sup>ˊ</sup>：蹦蹦跳跳。

【恁大奈等】an<sup>ˊ</sup> tai<sup>ˊ</sup> nai<sup>ˊ</sup> nen<sup>ˊ</sup>：這麼小而已。

【咻】hiu<sup>+</sup>：喊叫。

【𠵿見角】gag<sup>ˊ</sup> lag<sup>ˊ</sup> gog<sup>ˊ</sup>：角落邊邊。

【細阿鳥】se<sup>ˊ</sup> a<sup>+</sup> ziau<sup>ˊ</sup>：小丫頭。

【開陽】koi<sup>+</sup> rhong<sup>ˊ</sup>：開闊，此處指心情開

【打燈】da<sup>ˊ</sup> den<sup>+</sup>：學站立。

朗愉快。